

# CBETA電子佛典集成

---

CBETA Chinese Electronic Tripitaka Collection  
eBook

T04n0199

## 佛五百弟子自說本 起經

西晉 竺法護譯

# 目次

- [編輯說明](#)
- [章節目次](#)
  - [1 大迦葉品](#)
  - [2 舍利弗品](#)
  - [3 摩訶目犍連品](#)
  - [4 輪提陀品](#)
  - [5 須蔓品](#)
  - [6 輪論品](#)
  - [7 凡耆品](#)
  - [8 賓頭盧品](#)
  - [9 貨竭品](#)
  - [10 難陀品](#)
  - [11 夜耶品](#)
  - [12 尸利羅品](#)
  - [13 薄拘盧品](#)
  - [14 摩訶醜品](#)
  - [15 優為迦葉品](#)
  - [16 迦耶品](#)
  - [17 樹提衢品](#)
  - [18 賴吒和羅品](#)
  - [19 貨提品](#)
  - [20 禪承迦葉品](#)
  - [21 朱利般特品](#)
  - [22 醜醜施品](#)
  - [23 阿那律品](#)
  - [24 彌伽弗品](#)
  - [25 羅雲品](#)
  - [26 難提品](#)
  - [27 廠提品](#)
  - [28 羅槃廠提品](#)
  - [29 摩頭和律致品](#)
  - [30 世尊品](#)
- [卷目次](#)
  - 001,

- [贊助資訊](#)

## 編輯說明

- 本電子書以「CBETA 電子佛典集成 Version 2023.Q4」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 [service@cbeta.org](mailto:service@cbeta.org) 回報。
- 版權所有，歡迎自由流通，但禁止營利使用。

蓋阿耨達龍王者(晉名無焚)，佛在世時受別菩薩也，有神猛之德，據于崑崙之墟。斯龍所居宮館寶殿，五河之源則典覽焉，有八味水池，華殖七色，服此水者即識宿命。於時龍王請佛世尊及五百上首弟子，進饍畢訖坐蓮華上，追講本起所造罪福，皆由纖微轉受報應，彌劫歷紀莫能自濟，僥值正覺乃得度世。各自撰歌而達頌曰：

### 大迦葉品第一(十九偈)

佛人中上為法御， 斷除結獄遊舍衛，  
諸根為寂德巍巍， 如來自告其比丘：  
「有諸鬼神所娛樂， 種種眾華無央數，  
四瀆涌出向四方， 彼諸流河歸江海。  
私頭那提伯師子， 人不能至神足到，  
飛行疾矣乃越耳， 疾共詣彼淵流池。」  
比丘曰：「善唯從命。」 大通安住上弟子，  
聞尊教勅乘神足， 譬如鴈王導眾鴈，  
行詣進遊于江河， 悅觀輩類相娛樂，  
佛天中天亦如是， 與弟子俱而飛騰。  
佛至告諸弟子曰： 「寧識前世所更歷，  
為我各說誰行步， 而獲其福不可量。」  
彼迦葉仁佛弟子， 譬如師子歷深山，  
設有所歷無敢當， 則說前世所作行。  
「採取于野燕麥耳， 少所施與辟支佛，  
解脫心樂無有漏， 奉于空行意寂寞。  
彼時心念有此願， 尋即思惟於上法，  
與如是人俱合會， 於此終生鬱單曰。  
用彼因緣福所致， 更歷千反鬱單曰，  
然後生于勝命天， 於中最特無有雙。  
吾用彼福所造德， 亦復千反生忉利，  
著種種華香寶瓔， 身微妙好而自在。  
既於天上壽終已， 便復則生鬱單曰，  
用彼前世願所致， 以作是福因緣故。  
生于富家梵志種， 財產眾業無央數，

在五樂中而不貪，其於是佛無等倫。  
大哀所可講說法，諸力一心定眾根，  
七覺之意八道行，以為獲致於此法。  
便盡諸漏手執燈，與此眾等最後俱，  
合會行正直離邪，佛者如來所說善。  
奉禁戒人所志得，如其意念所欲求，  
最後我身以具滿，為盡生死拔根株。  
我皆絕除諸愛結，則為是佛法王子，  
第一止足常思道，心空清淨無所著，  
其志堅固無能轉，譬如大山不可動。」  
如是迦葉尊，在諸比丘僧，  
阿耨達大池，自說本福緣。

### 舍利弗品第二(十偈)

「吾為仙閑居，於彼見沙門，  
辟支佛之尊，身著絳衣被。  
覩之心歡喜，為之浣衣服，  
復為縫袈裟，數數為作禮。  
彼則愍念我，便飛虛空中，  
上下出水火，須臾忽不見。  
我即時叉手，自心作是願：  
『令我得如是，聰明大智慧。  
莫令生豪家，亦勿生賤種，  
常生于中家，志多作沙門。』  
用是功德故，吾以五百世，  
常獲致人身，世世作沙門。  
於是最後世，復還得人種，  
以值見正覺，導師無有上。  
則辦為沙門，於釋師子所，  
成就阿羅漢，清涼而滅度。  
今世尊目前，於比丘僧眾，  
論我智慧上，轉于正法輪。」  
舍利弗智慧，於比丘眾前，  
阿耨達大池，自說本宿行。

### 摩訶目犍連品第三(十五偈)

「吾為仙閑居，處于林樹間，  
於彼有人來，求我作沙門。  
吾除其鬚髮，為澆其衣服，  
縫之而染之，心中自歡喜。  
彼退在一面，而結跏趺坐，  
則得辟支佛，便飛于虛空。  
我時即興願：『令身得神足，  
使吾得如是，大力大神足。』  
用是福德故，在在所生處，  
天上及人中，照耀所造福。  
於時最後世，以逮得人身，  
如值見正覺，導師無有上。  
以為作沙門，於釋師子所，  
則成阿羅漢，清涼而滅度。  
所作善甚少，得安隱無量，  
我復作不善，今說且聽之。  
東出羅閱祇，生為尊者子，  
出舍外遊戲，人家求飲食。  
即見其父母，二人共相娛，  
見之即搥我，罵詈而逐我。  
但以正命耳，其身不施行，  
墮于黑繩獄，受苦不可計。  
其彼餘殃故，於是最後世，  
諸外異道學，搥碎身如葦。  
吾當以是疾，壽終而滅度，  
彼所作餘殃，爾乃滅盡耳。  
是故當悅心，至孝事父母，  
用歡悅心故，人得勝天上。」  
如是拘律尊，在于比丘眾，  
阿耨達大池，自說本因緣。

#### 輪提陀品第四(淨除十七偈)

「我昔往詣寺，見地不淨處，  
即取其掃箒，便掃彼寺舍。

竟觀寺清淨，心中甚忻踊，  
令我無垢塵，如此寺舍淨。  
用是功德故，在在所生處，  
面色和悅姝，端正難可比。  
其餘之福祚，於是最後世，  
父母則名吾，號曰為淨除。  
我於親族中，生時亦清淨，  
一切所愛敬，見者無厭極。  
值得見正覺，導師而無上，  
已成阿羅漢，清涼而滅度。  
我之所志願，使吾無垢塵，  
今無垢羅漢，無漏所作辦。  
假令掃除是，普天下使淨，  
不如為離欲，除掃所經行。  
假掃除天下，道人經行處，  
不如四方僧，掃除一步地。  
設復掃除是，滿天下精舍，  
不如於佛寺，掃除一步地。  
我身所造福，以是知差特，  
當掃除佛寺，其心懷欣踊。  
以此曉知之，等覺道德高，  
當供事佛寺，獲其祚甚大。  
唯君吾識念，昔曾所作善，  
以致彼果實，可意安隱樂。  
是故為佛寺，好淨心供事，  
唯仁此第一，福田無有上。  
於是能供事，得安而無量，  
皆為破壞除，一切姪怒癡。  
不輕空心悅，得福薄少乎，  
向如來正覺，及諸佛弟子。」  
如是輪提陀，在諸比丘前，  
阿耨達大池，自說本所因。

### 須蔓品第五(善念十四偈)

「昔者出遊觀，時與親友俱，



頭上戴傅飾，耳著須蔓花。  
惟衛神通佛，於彼立大寺，  
遙見眾庶人，共住而奉事。  
親友俱發家，各共齎好華，  
悉以清淨心，供散彼佛寺。  
我時見廣施，亦復初發意，  
便取林中華，以用上佛寺。  
所生不墮餘，昇天下為人，  
因是德本故，所作善照見。  
後值等正覺，無上之導師，  
果證阿羅漢，清涼得滅度。  
唯施一華耳，更得百千歲，  
天上自娛樂，餘福得泥洹。  
假令我素知，佛功德無量，  
便即起塔寺，其福無有極，  
未必心歡喜，其福猶為少。  
如來等正覺，及諸佛弟子，  
唯我憶念此，身所作功德，  
今已得實報，可意快安隱。  
緣是所作行，終始斷不生，  
無漏無所著，清涼得滅度。  
五道為已盡，不復更胞胎，  
是為最後世，然則不復起。  
解脫生死本，已度所有海，  
今我以是緣，得號曰須蔓。」  
時長者須蔓，會在眾僧中，  
於阿耨達池，自說本所作。

### 輪論品第六(明聽十一偈)

「惟衛佛世時，槃頭摩國土，  
本為四方僧，興立一房室。  
加以床臥具，皆用持布施，  
既與心歡喜，應時發是願：  
『我見等正覺，令得作沙門，  
逮無上無為，清涼正滅度。』  
是因功德本，九十一劫安，

既得自然見， 在天上世間。  
其餘功德福， 於今最後世，  
生[敖/力]長者家， 憍貴無兄弟。  
生為父所敬， 即聞垂言教，  
吾以子施與， 寶藏億種種。  
足底生異毛， 自然長四寸，  
身體柔軟好， 穩安得無害。  
過去九十劫， 其餘復如一，  
我身不識念， 舉足蹈地時。  
於今最後世， 已還得人身，  
成就無所著， 清涼為滅度。  
佛普見說我， 精進尊第一，  
解脫盡無漏， 已得不動句。」  
如是拘梨種， 在眾僧中央，  
於阿耨達池， 自說本功德。

#### 凡耆品第七(取善八偈)

「我不了福德， 本亦不識義，  
見惟衛佛寺， 供養而奉侍。  
金寺紫磨色， 幡繖以香華，  
見供養塔寺， 而得生善處。  
常在天人間， 所作得照見，  
過九十一劫， 未曾歸惡道。  
作少功德已， 獲安甚眾多，  
已得無所著， 滅度清且涼。  
假使我本知， 佛功德如是，  
常當供塔寺， 所得福踰此。  
是故用知明， 正覺德弘泰，  
當供養塔寺， 其福無終極。  
佛普見說我， 經樂為第一，  
多聞若干種， 辯才德至真。」  
時長者凡耆， 曾在眾僧中，  
於阿耨達池， 自說本所作。

#### 賓頭盧品第八(乞閉門十一偈)

「我本經父母， 生為子中尊，  
謹敬事其父， 亦孝養於母。  
二親及妹弟， 奴客僮僕使，  
吾為父母說， 飲食以時節。  
時起貪嫉意， 不當食父母，  
瞋恚謗於語， 能得飯食財。  
緣是所作罪， 墮大山地獄，  
燒炙黑繩中， 更苦不可計。  
從地獄中出， 世世所生處，  
常患大餓渴， 勤苦而飢死。  
於今最後世， 已還得人身，  
值見等正覺， 導師無有上。  
於釋師子所， 已得作寂志，  
成為無著道， 清涼而滅度。  
唯仁我於是， 神足能飛行，  
還入坎窟中， 爾乃得食耳。  
是故當歡喜， 供事於父母，  
一心稽首禮， 保祚無有量。  
唯仁我識念， 削所作惡行，  
皆受所種實， 罪福不可離。」  
賓頭盧閉門， 時會在僧中，  
於阿耨達池， 自說本所作。

### 貨竭品第九(善來二十一偈)

「曾為尊者子， 在般頭摩國，  
族姓多財寶， 眷屬所圍繞。  
周匝在王邊， 快樂無有極，  
端正見者喜， 顏色難為比。  
時我嚴駕出， 諸眾導前後，  
欲行遍遊觀， 并從眾採女。  
於彼遊觀時， 見相寂沙門，  
奉行安定儀， 身服赤絳衣。  
時我見沙門， 興發起惡意，  
憎惡其形像， 瞋恚不歡喜。  
為何下鬚髮， 顏姿黑醜陋，

癰疽疥身體， 羸疲身意俱？  
用是所造罪， 口說惡語故，  
於彼壽終後， 便墮地獄中。  
從獄得脫出， 容色黑醜惡，  
癰疽疥身體， 羸疲身意俱。  
捉瓦器乞匄， 著棄死人衣，  
衣弊服麤穢， 所住無安處。  
所欲往至詣， 乞欲係餬口，  
執杖見驅叱， 為人所嫉辱。  
如是五百世， 在在所生處，  
窮困常飢餒， 勤苦而餓死。  
時見等正覺， 比丘僧圍繞，  
與大眾會俱， 講說甘露句。  
適見大眾會， 即疾奔走趣，  
意欲於彼中， 希望飲食具。  
到見大眾會， 皆坐欲聽法，  
不獲副本願， 未有餼施者。  
時彼大慈哀， 如來告之言：  
『仁者善來此， 便來坐此座。』  
我應時喜踊， 則一心叉手，  
稽首世尊足， 却在—面坐。  
於是尊大哀， 瞿曇極慈悲，  
次第分別說， 為我講四諦。  
能仁除鬚髮， 因是見道跡，  
佛令作寂志， 於彼得神通。  
用是故號字， 名曰為茶竭，  
緣此佛說我， 正受為第一。  
佛勇猛大尊， 世雄為最勝，  
神通無極哀， 度脫我眾苦。」  
善來尊如是， 在於眾僧中，  
於阿耨達池， 自說本所作。

### 難陀品第十(欣樂十二偈)

「王舍國城東， 曾為富尊者，  
時世穀飢貴， 有道士遊彼。  
時我坐獨食， 有好道士來，

壞破緣一覺，自在得無漏。  
興起貪嫉意，其心志于惡，  
今此比丘來，焉得同太歲。  
於是念飲食，雜糲以馬通，  
道人食之已，應時即命過。  
我身壽終已，墮地獄甚久，  
合會及叫喚，世世見脯煮。  
從地獄得出，便還得人身，  
身常多疾病，懊惱而命盡。  
如是五百世，在在所生處，  
抱病常窮厄，懊惱乃命過。  
於是最後世，已得生人中，  
還見等正覺，導師無有上。  
出家為沙門，受釋師子法，  
已得羅漢道，清涼取滅度。  
吾於是仁者，神足無有漏，  
身體多疾病，所在不安隱。  
於是悉識念，我本所作行，  
皆獲其果實，罪福不可離。」  
如是難陀尊，在比丘眾中，  
於阿耨達池，自說本所作。

### 夜耶品第十一(名聞二十六偈)

「昔有一道人，入聚落乞匄，  
見死亡女人，青臙甚臭惡。  
結跏趺而坐，觀視無常變，  
省察敗不淨，一志學定心。  
便於彼坐上，有微細音響，  
聞聲用恐怖，則從一心起。  
見死腹潰壞，惡露而不淨，  
眾孔自流出，臭處難可當。  
腸胃五臟見，心肝皆散絕，  
若干無數蟲，觀已還靜心。  
察于外死身，內省自己軀，  
彼爾我如是，計本皆虛無。  
自從三昧起，修行不懈怠，

亦不出分衛，亦不思飲食。  
設我入聚落，而行求飲食，  
雖見端正色，當作惡露觀。  
瞻彼諸形色，如死人無異，  
察眾壞敗本，一切無所樂。  
我思行如是，而得離愛欲，  
奉遵四梵行，深惟不輕戲。  
於彼壽終後，便得昇梵天，  
於梵壽命盡，下生波羅奈。  
為豪貴長者，生其家作子，  
為眾所見敬，正受度無極。  
晝日常修行，於夜不睡眠，  
見女人眾多，等觀如腐積。  
枕鼓臥眠者，執箜篌伎人，  
伎樂器散地，夢想為窺語。  
於彼退思念，宿本功德行，  
想識不淨處，前世所更歷。  
適觀覩此已，志求無欲意，  
我時逼迫是，仁者我捨去。  
即從床上起，下殿避之逝，  
諸天愍念我，其門自然開。  
時出于國城，往詣流水側，  
遙視見彼岸，見沙門寂根。  
又見大寂志，舉聲而大叫，  
告之我窮厄，神通我捨欲。  
世尊深軟音，用我辛苦言：  
『童子來莫懼，於此無窮厄，  
心捨眾苦惱，轉度於彼岸。』  
往詣大哀所，世尊無比人，  
絕妙無等倫，譬如飢渴者，  
倒解識其義，即解識其義。  
於彼見道諦，從佛求捨家，  
瞿曇大慈哀，聽我作沙門。  
應時一夜中，天時將向曉，  
一切諸漏盡，清涼得滅度。  
是我前世時，所更作善行，  
是我最後世，逮得甘露跡。」  
如是賢夜邪，尊者子神通，

於阿耨達池， 自說本所作。

## 尸利羅品第十二(二十偈)

「昔波羅奈城， 迦葉佛泥洹，  
機惟王起塔， 七寶造甚大。  
爾時王所作， 有最大太子，  
我時為佛尊， 第一建剎柱。  
以是功德故， 世所生處，  
在天上人間， 其福自然見。  
在在所生處， 於國甚殷富，  
財數不可計， 常喜大布施。  
我於五百世， 惠施無所惜，  
給贍眾庶人， 寂志及梵志。  
緣一覺之行， 離愛欲無漏，  
清淨歡喜心， 供養五百眾。  
由是功德故， 在此最後世，  
生豪貴釋種， 應時口說言：  
『家中寧有寶， 錢財及於物，  
我當以施與， 救足諸貧窮。  
我與無厭憊， 救濟眾下劣，  
孚善見答報， 豈能有所惠？』  
家中聞吾言， 愁憂用惶懼，  
馳散赴八方， 乳母悉避去。  
母以恩愛故， 便即告我言：  
『為天人鬼神， 何以言大疾？』  
我時即啟曰： 『我是人非鬼，  
追識宿命施， 好欲見惠人。』  
時母聞其言， 踊躍無所畏，  
然許勸助之， 恣意所布施。  
家中眷屬多， 母勅供養我，  
為眾所敬愛， 見者莫不喜。  
我爾時適生， 其家即興熾，  
緣是諸寂志， 名我尸利羅。  
於彼便布施， 給足諸貧陋，  
得值等正覺， 便捨家為道。  
初生家興熾， 墮地能語言，  
是故號尸利， 其名自然流。

生家無所貪，亦不用恐懼，  
緣信出家學，神通一切具。  
為國主所欽，大臣眾人民，  
多獲衣食供，床臥諸所安。」  
如是尸利羅，在比丘僧中，  
於阿耨達池，自說本所作。

### 薄拘盧品第十三(賈姓十二偈)

「我昔曾賣藥，於槃曇摩國，  
在惟衛佛世，敬諸比丘僧。  
時有病瘦者，行藥療其疾，  
供給諸根藥，以惠諸比丘。  
一歲諸眾僧，令無所乏少，  
時施諸沙門，與一呵梨勒。  
於九十一劫，未曾歸惡道，  
在天上人間，其福自然見。  
所作德少耳，受福不可量，  
施一呵梨勒，長久生善處。  
其餘所有福，今還得人身，  
值見平等覺，導師無有一。  
未曾自識念，郡縣受施處，  
唯仁我二夜，證通三達智。  
常衣羸惡服，五納之震越，  
棄家行學道，願樂在閑居。  
其年百六十，於此無垢濁，  
未曾有疾病，所生處常安。  
佛普見說法，少欲無睡眠，  
觀布施藥者，其福廣如是。  
今我悉識念，本殖少功德，  
悉獲其果實，可意而安隱。」  
時賢薄拘盧，在眾比丘僧，  
於阿耨達池，自說本所作。

### 摩呵醜品第十四(大長十二偈)



「昔作韋皮師， 本生亦安隱，  
時國大穀貴， 柔皮以為韋。  
時得好殷皮， 煮熟令大美，  
時有沙門來， 乞匄欲求食。  
見之即歡喜， 則分用布施，  
其寂志食已， 尋飛在虛空。  
見道人踊躍， 應時叉手向，  
恭敬普所在， 所遊輒追隨。  
欣喜廣大心， 便自發願言：  
『令我逮如是， 常與尊者俱。  
如此道人法， 所逮得法身，  
令我身如是， 疾成正願義。』  
所施無形色， 其氣亦穢惡，  
無香亦無味， 我所施如是。  
所作德少耳， 獲福安無極，  
在天上人間， 其福自然見。  
於是最後世， 還得于人身，  
值見等正覺， 道師無有上。  
我本所求願， 見世尊上人，  
於是悉如意， 清涼得滅度。  
於是悉識知， 本所作功德，  
悉獲其果實， 可意歡喜受。」  
如是彼大尊， 名醜羅大通，  
於阿耨達池， 自說本所作。

### 優為迦葉品第十五(八偈)

「導師有二人， 同類悉兄弟，  
見迦葉佛塔， 搪揆崩壞落。  
合集眾賈人， 更補治起塔，  
時兄弟二人， 俱扶豎剎柱。  
緣是功德本， 生天上甚久，  
來還生人間， 在於勢族種。  
未見等正覺， 捨家學異道，  
在泥蓮水邊， 久習編髮志。  
世尊無等倫， 愍念哀我等，  
在於恒水側， 感動見變化。

我等見變化，從佛求下髮，  
大尊念愍傷，聽我等出家。  
供養佛塔寺，前稽首作禮，  
用是眾庶等，清涼而滅度。」  
優為迦葉尊，及江河迦葉，  
於阿耨達池，自說本所作。

### 迦耶品第十六(提取十五偈)

「昔為賣香者，既獲香賣之，  
有一童女人，來到香肆上。  
容貌端正好，見彼趣我所，  
適捉與調戲，欲意察著之。  
身亦不犯觸，亦不與合會，  
唯但執其臂，為媯他女人。  
用是過惡故，壽終墮地獄，  
來還得人身，右臂自然枯。  
如是五百世，所生處皆然，  
右臂常枯槁，苦痛甚不便。  
仁者識念是，作罪薄少耳，  
獲殃甚眾多，善惡不可離。  
值見等正覺，捨家為沙門，  
已得阿羅漢，清涼入滅度。  
仁者吾於是，有神足自在，  
於今一右臂，不如左臂便。  
假使有男子，喜犯他人者，  
壽終墮地獄，苦痛甚酷毒。  
不當外犯色，如捐棄盛火，  
智者覺了人，已每知止足，  
設見他婦女，當作不淨觀。  
我更泥犁中，受苦不可計，  
我犯是罪時，自謂不足言，  
悉獲是果實，罪福不可離。  
值見等正覺，導師無有上，  
已得無所著，清涼得滅度。  
是為最後生，逮得甘露句，

已解一切苦， 清涼得滅度。」  
迦耶尊如是， 在比丘僧中，  
於阿耨達池， 自說本所作。

### 樹提衢品第十七(三十偈)

「惟衛佛世尊， 槃頭摩國城，  
時有富長者， 名阿能乾那。  
時佛之眷屬， 六十二百千，  
請惟衛佛尊， 及眾供三月。  
我主槃頭摩， 我供人中尊，  
飯食日珍異， 供養佛弟子。  
飯食佛如是， 在槃頭摩國，  
彼時最後施， 槃頭王欲興。  
供養好飯食， 衣被及床臥，  
作微妙祠壇， 是王之所起。  
奉上諸所安， 床座眾百千，  
於一一比丘， 惠施令可意。  
彼國王最後， 所供養如是，  
奉事無極雄， 神通尊導師。  
我時見彼供， 床臥諸所安，  
衣被飲食施， 床座悉具足。  
時諸天中尊， 帝釋來詣我，  
彼天帝謂我： 『我當為汝伴。』  
即時化祠壇， 可意嚴如天，  
施設天上座， 供以天飲食。  
彼時佛世尊， 惟衛無等人，  
請供滿一月， 尊人及弟子。  
我以天飲食， 供養於導師，  
奉以天衣被， 大人并弟子。  
用是功德故， 受恩不可量，  
從九十一劫， 未曾歸惡道。  
所作福照見， 天上及世間，  
我奉侍大聖， 惟衛無極尊。  
於今最後世， 生羅閱祇城，  
萍沙王之宮， 富家無量寶。」

為萍沙國王， 一切所愛敬，  
眾人見供奉， 諸臣及人民。  
我在天伎樂， 於是世自恣，  
生世得人身， 天伎樂自娛。  
於是佛大智， 導師無有上，  
來詣羅閱祇， 導師加愍傷。  
我聞大智慧， 佛詣王舍城，  
心歡喜踊躍， 往詣仁世尊。  
遙見世光燦， 光明出普照，  
即從車乘下， 步行往詣佛。  
欣然我前行， 稽首最勝足，  
禮如來畢竟， 却在—面坐。  
我久思正雄， 今乃見大人，  
導師人中明， 降伏魔羅網。  
世尊無有上， 應時愍傷我，  
解說四諦事， 如應為講本。  
彼曰無極哀， 世尊說如是，  
大通欲出家， 願得受大戒。  
即時大智慧， 佛者無等倫，  
說言比丘來， 具足成沙門。  
以是無放逸， 堅精進定意，  
遭遇甘露處， 無為興無動。  
逮見等正覺， 導師無有上，  
以成阿羅漢， 清涼而滅度。  
唯仁我追念， 身本所作惡，  
悉受是果實， 可意樂安隱。  
廣行有周旋， 離生老病死，  
脫於一切惱， 愁憂及啼哭。」  
如是樹提尊， 在比丘僧中，  
於阿耨達池， 自說本所作。

### 賴吒憇羅品第十八(二十六偈)

「有王修惟尼， 其王有一子，  
名賴吒拔檀， 是王最小子。  
迦葉佛吉祥， 興起大塔寺，  
欲護父王意， 為作剎柱頭。」

心歡喜踊躍， 建立承露槃，  
願我作沙門， 等正覺共會。  
用是功德故， 世所生處，  
於天上人間， 其德自然見。  
是為最後生， 在投樓吒國，  
生於尊者家， 獨有一女耳。  
一切所愛敬， 如是狗獵王，  
是我親里家， 國土亦如是。  
端正甚姝好， 顏貌如敷踰，  
在人中娛樂， 一切欲自恣。  
可意敬世尊， 來詣投樓吒，  
我見心歡喜， 便求作沙門。  
本功德所致， 化變難比倫，  
慈哀愍傷我， 口便發是言：  
『諸佛之正教， 父母不樂者，  
不得為沙門； 族姓子自報。』  
即時還歸家， 前白父母言：  
『父母願聽我， 出家為沙門。』  
父母聞我言， 愁憂不可勝，  
子雖命時終， 不欲相遠離。  
我時不飲食， 一心無所樂，  
志於清白法， 欲求為沙門。  
我時不飲食， 萎臥於空地，  
假令不聽我， 便當死於是。  
六日不飲食， 一心無所樂，  
志於清白法， 欲求為沙門。  
時親厚知識， 往謂父母言：  
『善哉聽之去， 用死人身為？  
假令能樂者， 為沙門續在，  
命存可數見， 死者當奈何。』  
時父母知識， 共出悲好音，  
設使作沙門， 來見我當聽。  
時親厚知識， 便往謂之言：  
『父母已聽汝， 明者為沙門。』  
父母共結約： 『假使為沙門，  
數來相見者， 子聽汝出家。』  
彼聞善哉言， 自養有勢力，  
往詣世尊所， 便前白佛言：

『唯然已聽我。』 便受佛尊教。  
世尊下我髮， 令我作沙門。  
施承露槃故， 受安甚眾多，  
於天上世間， 功德自然見。  
佛普見說我， 樂閑居第一，  
已得阿羅漢， 清涼而滅度。  
是故當歡喜， 悅心向大哀，  
當供養塔寺， 得脫大恐懼。」  
賴吒耆大尊， 閑居五納衣，  
於阿耨達池， 自說本所作。

### 貨提品第十九(二十七偈)

「曾在王舍城， 為富大尊者，  
有五百道士， 住我家一年。  
五百諸長者， 一切皆往詣，  
彼時諸道人， 各就一家食。  
譬如我等故， 家中所炊食，  
一一諸比丘， 供養亦如是。  
聽年長道士， 彼分與長者，  
無上尊道人， 其心念如是。  
飯食五百人， 豆羹以灌上，  
我所作供具， 飼比丘如是。  
如是連二日， 布施彼比丘，  
我時輒興意， 貪嫉惡心意：  
『尚難飼我子， 婦女及姊妹，  
兄弟諸親屬， 是飯食供養。  
何況此比丘？ 當供養三月；  
供養五百人， 大減損我家。』  
我欲令比丘， 作方便令死，  
『假使命過者， 不損用我物。』  
心自念惡已， 馬通糲飯中，  
持用飯食之， 謂殺無所苦。  
噉此飯食已， 得病甚困厄，  
結刮其腸胃， 傷絕於五臟。  
樂法得道人， 則為已命過，  
諸天及鬼神， 俱共發聲言：  
『是長者大惡， 傷害殺道人，

緣一覺之尊， 清涼無所漏。』  
我聞知所語， 思念苦惱愁，  
我等罪無量， 坐害善道人。  
親屬聞是言， 悉共愁憂念，  
皆會諸道人， 對悔過自首。  
歸命諸道人， 悔過自首已，  
請五百道人， 供養以飯食。  
重悔過自首， 歸命眾道人，  
供養飯食已， 心自發願言：  
『令我與是等， 諸尊者合會，  
如是等得度， 我心脫如是。  
世所生處， 勿令在貧窮，  
莫令我興起， 貪嫉惡心意。』  
害辟支佛已， 犯是惡罪殃，  
於彼壽終已， 墮太山地獄。  
苦痛無數千， 懊惱不可言，  
來還得人身， 短命速疾過。  
所在得勢富， 眾人所供養，  
腸胃每焦爛， 然後乃命過。  
棄捐家居去， 沙門無所慕，  
精進修佛教， 斷除一切欲。  
假令我捨身， 向般泥洹時，  
諸腸胃五臟， 各各崩壞爛。  
我所作過惡， 惡意害比丘，  
所作餘罪殃， 最後當畢了。  
我身所起惡， 及所行善行，  
悉還受果實， 善惡俱前獲。』  
舍衛城里生， 茶提大神足，  
於阿耨達池， 自說本所作。

### 禪承迦葉品第二十(十一偈)

「有諸比丘僧， 終竟于七歲，  
時國穀米貴， 飢餓大恐懼。  
我分得一人， 摩竭妙道人，  
緣一覺之尊， 清涼無有漏。  
彼時我興發， 起意之為惡，  
『我當持何用， 施飼是比丘？』

時停置飯食， 令生蟲臭惡，  
往觀諸作使， 然後供養之。  
以是所作罪， 壽終墮地獄，  
合會燒炙之， 苦痛不可言。  
從地獄得出， 世所生處，  
作若干方便， 求飯食難得。  
是為最後世， 來還生人間，  
逮見等正覺， 無上之導師。  
以信故出家， 除害諸漏盡，  
已得無所著， 清涼而滅度。  
仁者吾於是， 神足常自在，  
求食設方便， 若干不能得。  
遠行避道路， 疲勞不可言，  
既乃得所饒， 飯食諸供具。」  
承伽迦葉尊， 大通名所作，  
於阿耨達池， 自說本所作。

### 朱利般特品第二十一(八偈)

「昔我先世時， 曾為養豬者，  
在於江水傍， 繫[打-丁+繫]眾豬口。  
欲濟至江半， 身獨由得渡，  
豬不得喘息， 中流皆溺死。  
爾時我治生， 亡遺無所依，  
仙人來至彼， 從頂有慈哀。  
便勸教化我， 剃除吾鬚髮，  
解喻誨善律， 行無相三昧。  
於彼壽終後， 便得生天上，  
天壽復竟盡， 即還為道人。  
逮見等正覺， 捨家為寂志，  
所在意矇暝， 受經尋輒忘。  
我諷學一偈， 三月乃諳知，  
習讀誦四句， 斷絕諸愛欲。」  
世尊時問之， 朱利般特說，  
從來善惡事， 於阿耨達池。



## 醍醐施品第二十二(二十七偈)

「迦葉佛滅度， 我為後弟子，  
博聞知三世， 常祕惜經法。  
不為比丘說， 不肯示與人，  
儻餘乞本知， 便當與我等。  
設有比丘來， 至我所問事，  
吾則欺詐之， 不解意結恨。  
眾道人恚還， 憂恚罵詈言：  
『何嫉不說法？ 仁者豈為往？』  
臨欲壽終時， 心即自悔責，  
未曾講論法， 是為大不善。  
自知壽向盡， 餘過有七日，  
聚會眾僧類， 應時為說法。  
晝夜講諸要， 蠲除貪嫉妬，  
說法未竟畢， 於彼便命過。  
如我所分別， 聞者極妙快，  
受教思惟義， 展轉相勸化。  
所說法尠少， 聚會人七日，  
用是得生天， 天伎以自娛。  
天上壽終下， 來還受人身，  
在迦惟羅衛， 生釋國王家。  
端正見者敬， 為眾所愛樂，  
大財無極寶， 普以度無極。  
見諸族姓子， 來者皆棄家，  
我羨為寂志， 捐家愛欲財。  
世尊無等人， 慈念愍哀我，  
屢數率勵我， 勸導令出家。  
吾便敬遵佛， 無上之喜教，  
唯仁者我身， 七年行布施。  
於是惠與已， 終竟于七歲，  
然後作寂志， 受勝智慧誨。  
七年為長久， 人命為甚短，  
今日便布施， 誰能保身命？  
用尊是往故， 即時作寂志，  
唯仁我七日， 出家除鬚髮。  
信故為沙門， 修行佛法身，  
二十五歲中， 寂定心如水。」

於是弊惡道，起念著家事，  
奉行捐損業，亦不用甘露。  
於彼甚慚愧，發求無極利，  
毀辱于親屬，悉當見仇憎。  
作是為不可，亦不所僥恨，  
已出志守寂，豈復返懷居？  
興家種姓意，財利之所欲，  
當能斷斯著，終不捨離戒。  
寧令我身沒，其壽所憎惡，  
我當捉大刀，安用此命為？  
便執利刀劍，除割所因緣，  
刈截垢濁已，然後心解脫。  
一心便解度，稍數令人寂，  
我於慈果實，速值法光明。  
我壽向終時，講說尊妙法，  
緣是所可行，定意度無極。」  
釋子大神足，弱根薩波達，  
於阿耨達池，自說本所作。

### 阿那律品第二十三(無獵九偈)

「昔我曾不食，彼世時施與，  
遭遇見沙門，大通和菴吒。  
以故生釋種，號曰阿那律，  
功德自娛樂，俳伎之所娛。  
時見等正覺，即喜慕世尊，  
覩之心踊躍，捨家為寂志。  
宿世行精進，方便常堅彊，  
已脫三達智，具足如佛教。  
自識本宿命，造行所更歷，  
於忉利天上，積七世在彼。  
七返還人間，人間轉勢尊，  
富貴君子家，金珠寶自然。  
於是七彼七，生死凡十四，  
本悉識知之，前世之所行。  
如是所與果，曾無慳嫉意，  
世世所生處，常求不生死。」

時尊阿那律， 處于眾僧中，  
於阿耨達池， 自說本所作。

#### 彌伽弗品第二十四(鹿子十四偈)

「昔我逐勇狗， 往詣藥肆上，  
緣一覺之尊， 身體得不豫。  
給之以醫藥， 瞻養至七日，  
尊人過七日， 便飛昇虛空。  
我時見告語， 家之僕童客，  
眾祐已來臻， 如是出家學。  
我聞僕所說， 辟支佛飛行，  
其志踊躍喜， 一叉手向。  
緣是喜悅意， 布施醫藥故，  
在天上人間， 功德自然見。  
於今最後世， 復還得人身，  
值見等正覺， 導師無有上。  
於釋師子所， 出家為寂志，  
已得無所著， 清涼而滅度。  
於昔吾於是， 得供甚眾多，  
衣被及飲食， 床臥所安具。  
為其縫衣服， 從施醫藥故，  
四方給諸藥， 所安無所乏。  
天人往告語， 萍沙之國王，  
卿當以醫藥， 施與彌伽弗。  
仁國當興利， 眾藥大熾盛，  
遣耆域醫王， 擎藥與鹿子。  
四面醫藥來， 皆悉歸趣我，  
彼時王萍沙， 施遣大神通。  
於是來授我， 具足柔軟堂，  
悉遍比丘僧， 千二百五十。」  
其鹿子比丘， 六通大神足，  
於阿耨達池， 自說本所作。

#### 羅雲品第二十五(十偈)

「我昔曾為王，典主摩竭國，  
人民甚眾多，決事以義理。  
爾時有仙人，飲他溝中水，  
即來詣我所，前語我如是：  
『大王我為賊，乏飲不與水，  
便當謫罰我，如拷盜竊者。』  
我時即報言：『仙人持法藥，  
我恣聽仁者，便去隨其欲。』  
『大王我狐疑，咎結不得除，  
便當謫罰我，今乃消殃罪。』  
即勅著後園，忘之至六日，  
過六日已後，亦不得飲食。  
坐是因緣故，未曾有惡意，  
墮燒炙黑繩，更歷六萬歲。  
畢是有餘殃，於今最後生，  
處在母腹中，六年乃得生。  
未曾起亂意，身口不犯罪，  
乃值得果實，罪福不可離。」  
如是羅雲尊，在於比丘僧，  
於阿耨達池，自說本所作。

### 難提品第二十六(十四偈)

「昔惟衛佛世，我施煖浴室，  
一洗比丘僧，便自發願言：  
『令我與是等，尊眾共集會，  
世世得清涼，離欲無垢塵。  
端正常徐好，清淨若妙花。』  
於彼壽終後，便得生天上。  
在天上人間，顏色好端正，  
世世所生處，所住大勢尊。  
於彼壽終後，來還生人間，  
諸天及人民，見我無厭足。  
見辟支佛塔，繕治泥整頓，  
聖飾令鮮白，於上懸幡蓋。  
我時自發願，欲求得相好，  
金體紫磨色，端嚴無有比。  
因是所作福，生波羅捺國，

於脂惟尼生， 作子無恚害。  
見迦葉佛塔， 其心為歡喜，  
輒詣其寺中， 豎立承露槃。  
用是施塔故， 及治聖飾塔，  
興建剎柱槃， 受福不可量。  
從彼有餘福， 於是最後世，  
生釋氏王家， 便為佛之弟。  
我身自然有， 大人之相好，  
莊嚴成羅羸， 平等布三十。  
佛普見說我， 端正最第一，  
已除盡諸漏， 逮得甘露句。」  
難提父母子， 於比丘僧中，  
於阿耨達池， 自說本所作。

### 飈提品第二十七(十九偈)

「昔世穀米貴， 飢餓大恐懼，  
比丘有五百， 求食則施與。  
一切諸長者， 惠施眾道術，  
分衛得飯食， 便持來授我。  
雖得粗細食， 常分以與身，  
亦不能知我， 每隨用我語。  
諸人民來趣， 行求飯食具，  
我爾時自力， 從彼便出去。  
是時各馳走， 孚遠相求索，  
盡力從後追， 不能及逮我。  
即渡於流河， 便却坐一面，  
周匝四向視， 得靜無來人。  
『我今日獨食， 柔軟美且香，  
飽滿意盈足， 終慕獲安隱。』  
於是有比丘， 則緣覺世尊，  
威神大巍巍， 生死除無餘。  
意慮常念言， 窮賤甚苦劇，  
本不修功德， 是故令我貧。  
即興清淨心， 歡踊意念言，  
當施與比丘， 是本眾祐者。  
時世尊便受， 則於彼飯食，  
用憐愍傷我， 便飛在虛空。」

我時即發願：『莫復令我貧，  
 後生勢富家，端正如妙華。  
 與如是等尊， 世世共會遇，  
 使我承此法， 如仁者所得。』  
 緣是所作德， 受安長且久，  
 於天上人間， 所作德自見。  
 亦得為國王， 天人無數反，  
 未曾墮惡道， 亦無有罪殃。  
 從彼有餘福， 於是最後世，  
 來生勢富家， 釋種大姓生。  
 爾時佛世尊， 來詣所生地，  
 我即為寂志， 并與親屬俱。  
 我本所立願， 輒如意具足，  
 已得無所著， 清涼且滅度。」  
 捨勢為沙門， 颯提受佛教，  
 於阿耨達池， 自說本所作。

#### 羅槃颯提品第二十八(十四偈)

「拘樓秦佛時， 昔有起塔者，  
 我時在彼住， 其寺甚高大。  
 興造此塔寺， 我口呵謔之：  
 『是塔甚太大， 何日當成就？  
 可稍作功德， 如是自立辦，  
 既不多勞煩， 塔寺亦速訖。』  
 用口說謗言， 坐犯語罪報，  
 命盡壽終後， 便墮地獄中。  
 從地獄得出， 短小身玄醜，  
 世所生處， 為眾所輕邈。  
 迦葉佛世時， 為烏烏赤[口\*(佳/乃)]，  
 波羅捺中道， 翱翔叢樹間。  
 瞻見世光曜， 比丘所圍繞，  
 即順佛為禮， 口出悲音聲。  
 佛世尊所遊， 波羅捺國時，  
 每隨行出入， 常繞向悲鳴。  
 緣是所作德， 來還得人身，  
 逮見等正覺， 無上之導師。  
 得出為寂志， 於釋師子所，

已為無所著，清涼而滅度。  
羅漢得自在，六通大神足，  
名曰為持法，正真有辯才。  
一切眾聚會，聽聞我音聲，  
諸天及人民，一切皆歡喜。  
我作罪少耳，作福亦不多，  
皆獲其果實，所為二罪福。」  
羅槃毘提尊，在於比丘僧，  
於阿耨達池，自說本所作。

### 摩頭憇律致品第二十九(二十一偈)

「昔於惟耶離，身為大獼猴，  
趣往取佛鉢，比丘見被呵：  
『得無壞佛鉢。』世尊告比丘：  
『比丘勿得呵，是終不壞鉢。』  
我時取佛鉢，徐徐持上樹，  
盛以滿鉢蜜，便則從樹下。  
手擎滿鉢蜜，以奉上世尊，  
蜜中有蟲穢，正覺不肯受。  
佛見其鉢中，死蜂與蜜雜，  
尋好擇出之，復擎重上佛。  
時佛世光燦，復更不聽受，  
我以水淨洗，仍前稽首上。  
以水灑其上，更盛異鉢中，  
供養佛尊已，心踊躍歡喜。  
世尊無等人，彼時度死蜂，  
受此一鉢蜜，服食及弟子。  
我時甚踊悅，叉手而向佛，  
專住法王前，其心常精進。  
在彼發願言：『令我得人身，  
來值世尊世，使得最上義。』  
緣是所作德，因用得人身，  
逮得等正覺，無上之導師。  
得出為沙門，給侍釋師子，  
已為無所著，清涼而滅度。  
得自在羅漢，六通大神足，  
名曰為出蜜，諸比丘亦知。」

知前所作福， 於今得恭敬，  
 與數百比丘， 共遊行周旋。  
 設在窮乏路， 比丘僧飢渴，  
 心適自發願： 『我欲得蜜漿。』  
 知我心所念， 眾人即遠來，  
 齎持蜜美食， 以用奉上我。  
 我尋便受之， 自然極美多，  
 以施比丘僧， 可意甚飽滿。  
 我應時生已， 獼猴所作行，  
 度脫無徑路， 便得甘露句。  
 如我本所願， 輒得如其意，  
 供養佛世尊， 所求則具足。  
 唯仁每悉念， 我所作功德，  
 悉獲其果實， 可意安隱吉。」  
 如是出蜜尊， 在比丘僧中，  
 於阿耨達池， 自說本所作。

### 世尊品第三十(五十偈)

一切勝普明， 一切世間最，  
 得除盡諸垢， 降一切眾會。  
 諸通慧普見， 大人一切暢，  
 度諸怨恐懼， 法船濟彼岸。  
 曉了眾所化， 欣然愍世間，  
 矜傷脫眾生， 以義一切救。  
 除去一切人， 悉解諸繫縛，  
 一切人中最， 說法為眾眼。  
 大人無極慧， 大雄極名聞，  
 大光無極法， 以度於最法。  
 大力化無黠， 開化大明慧，  
 歡勸大眾人， 大醫多所兼。  
 世尊壞眾恐， 無上除諸憂，  
 佛仁為度脫， 大牢獄閉繫。  
 大龍大師子， 無著大比丘，  
 大智慧世尊， 救濟眾塵勞。  
 精進有大力， 方便大堅彊，  
 降伏眾天民， 大道寂靜安。  
 佛大天中天， 一切諸鬼神，



悉禮智慧足，佛出哀世間。  
恒在大生死，壞決羈羅網，  
神通無極哀，度脫大牢獄。  
大龍大天人，於眾會最先，  
廣施無極施，已逮弘寂跡。  
尊長士仙人，已度諸尊法，  
成就大弟子，導師德極尊。  
眾祐中最上，無上除愁憂，  
諸所度脫勝，一切相好尊。  
斷絕諸色欲，拔濟諸恩愛，  
時遊在龍王，阿耨達大池。  
一切所作辦，踊在虛空中，  
弟子眾圍繞，寂然有五百。  
愍傷有極哀，慈護一切人，  
觀察比丘眾，便自說是言：  
「明聽我所語，前世之所造，  
身始有所作，今所獲餘殃。  
吾昔宿命時，作人名文羅，  
誹謗無瑕穢，善妙辟支佛。  
眾人大來會，縛束善妙士，  
著杻械閉繫，須出如死囚。  
吾時見沙門，得縛束苦惱，  
其心發慈哀，身則為救解。  
用是罪殃故，墮地獄甚久，  
後來生人間，常為人所謗。  
用是有餘殃，於此最後世，  
須陀利異道，共議誣謗我。  
曾為婆羅門，博聞持道術，  
有五百學志，講術藪樹間。  
時有大神力，五通比丘來，  
我見道人至，誹謗揚其惡。  
仙人深愛欲，自高處樹間，  
諸摩納聞之，便共效我宣。  
時一切學志，家家行乞匄，  
大眾中誹謗，仙人有垢欲。  
緣是所犯罪，須陀利女人，  
佛五百弟子，悉共被誹謗。  
佛為一切明，有虛妄之謗，

知世吒弟子，是為沙門耶？  
犯是罪殃已，便墮惡道中，  
生在太山獄，勤苦甚酷毒。  
以此有餘殃，旃遮摩尼女，  
在大眾會中，虛妄掩殺佛。  
曾為三兄弟，而共諍錢財，  
推撲墜深谷，石抬以殺之。  
以是所犯罪，墮太山地獄，  
燒炙在黑繩，毒痛甚酷苦。  
以此有餘殃，調達石所抬，  
於是石墮落，中傷佛足指。  
乘船入江海，俱欲渡深水，  
時共載船上，拔刀殺賈人。  
用犯此罪故，身墮地獄中，  
以是餘殃故，鐵刺見佛前。  
曾在捕魚肆，生為漁者子，  
有捕殺魚者，我爾時生心。  
從是所犯罪，墮太山地獄，  
燒炙在黑繩，勤苦甚毒痛。  
隨樓勒國王，傷殺釋子時，  
以是有餘殃，於今得頭痛。  
惟衛世尊時，罵詈其弟子，  
不應食粳米，當令噉生麥。  
用是所犯罪，坐口出惡言，  
墮於黑繩獄，受苦不可計。  
以此有餘殃，怨結婆羅門，  
請我終一時，三月中噉麥。  
曾為治病醫，時療尊者子，  
合藥分倒錯，令疾轉增劇。  
用犯此罪故，墮地獄甚苦，  
以此有餘殃，是故得下利。  
吾昔前世時，曾為手搏師，  
與力士相撲，害殺有佛子。  
用犯此罪故，受苦難訾量，  
以此餘殃故，脅肋為之痛。  
謂難提和羅，輕毀迦葉佛，  
用見此沙門，言不得佛道。」

佛五百弟子自說本起經

---

## [CBETA 贊助資訊](https://www.cbeta.org/donation/index.php)

[.\(https://www.cbeta.org/donation/index.php\)](https://www.cbeta.org/donation/index.php)

CBETA 成立於 1998 年，於 2023 年 8 月 7 日轉型成為基金會。成立多年來，一部部佛典在嚴謹控管中轉換為數位典藏，不只數量龐大，而且文字校訂精確可信，又加新式標點方便閱讀。「CBETA 電子佛典集成」不僅獲得國際學界的重視及肯定，也成為大眾廣為運用的公共資源，如此成果都是在廣大信眾及有識之士的支持下才得以實現。

對一個從事佛法志業的非營利團隊，能夠長期埋首理想、踏實耕耘是非常不容易的。如今，CBETA 運作經費日漸拮据，但「佛典集成」仍有許多未竟之功。因此，懇請大家慷慨解囊、熱情贊助，讓未來有更多更好的電子佛典。

您的捐款本會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

---

## 信用卡線上捐款

本線上捐款與 netiCRM 及 NewbPay 藍新金流合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

不管您持有的是國內或國外卡，所有捐款最終將以新台幣結算，所以我們所開立的捐款收據也將以新台幣計。

線上刷卡支持定期定額與單筆捐款。(銀聯卡不支援定期定額)

## [前往捐款](#)

---

### 劃撥捐款

郵政劃撥帳號：5 0 4 6 8 2 8 5

戶名：財團法人佛教電子佛典基金會

欲指定特殊用途者，請特別註明，我們會專款專用。

---

### 線上信用卡 / PayPal 捐款

PayPal 是一個跨國線上付款機制的公司，CBETA 引用其服務，提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜，由於付款幣別為美元，我們除了會依您所贊助之美元金額開立收據外，另我們會依捐款當日公告匯率開立台幣收據，此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

### [線上信用卡 / PayPal 贊助](#)

---

## 支票捐款

支票抬頭請填寫「財團法人佛教電子佛典基金會」。

For donations by check, please write the check to  
"Comprehensive Buddhist Electronic Text Archive  
Foundation".

---